

Oqaasiliortut marlungornermi marsip ulluisa 20-anni
2001, nal. 10.00 ataatsimiinnerannit imaqarniliaq

Peqataasut: Carl Chr. Olsen, Alibak Steenholdt, Sofia Geisler, allatsigalugu Kristine Olsvig. Kelly Berthelsen Nuka Møllerilu ataatsimiittunut allanut peqataanertik peqqutigalugu matumani peqataanngillat.

Oqaluuserisat:

1. Oqaluuserisassanut qulequttanik akuersineq.
2. Februaarip ulluisa 16-ianni ataatsimiinnermit imaqarniliamut akuersineq.
3. Ilisimatitsissutit.
4. EF, EU-lu pillugit allagaq.
5. Timip pisatai aamma psykologi/psykiatri pillugit taaguusersuutit saqqummersinnissaat.
6. Taasariaqartut allat.

- 1 pillugu -


Oqaluuserisassat qulequtaat akuerineqarput.

- 2 pillugu -

Imaqarniliaq akuerineqarpoq.

- 3 pillugu -

CCO.: Kultureqarnermut, Ilinniartitaanermut, Ilisimatusarnermut Ilageeqarnernullu Naalakkersuisoq, Lise Skifte Lennert aqagu marsip ulluisa 21-ianni CCO-imit KO-imillu ataatsimeeqatigineqassaaq, Oqaasiliortut Nordisk Sprogmodemut aggustimi Sverigimi ingerlanneqartussamut peqataasinnaanissaat, taamatullu angalanissaannut aningaasartuutissat KIIIP-imit aningaasaleeqataaffigineqarsinnaanersoq ujartuiffiginarlugu. Angalanissamut pilersaarutit



piviusunnussappata, ataatsimeersuareernerup kingorna Oqaasiliortut Dansk Sprognævnermiut tikillugit suleriaasaannik paasiniaaffigisinnaassavaat.

Oqaatsinut politikkissap nalunaarusiornera kingusinnerpaamik juulip aallaqqaataani suleqatigiissitap naammassereersimasussaavaa. Siulittaasup naatsorsuutigaa piffissaq killiliussaq sioqqullugu naalunaarusiaq naammassisinnaassallugu.

Suleqatigiissitap Robert Petersen, Thomas Andersen aamma Michael Reuter peqatigalugit poorskip kingorna Danmarkimi ataatsimiissapput.

CCO.: Nunavumiit Eva Aariak danskimik aappaarluni marsip ulluisa 27-ianni 28-iannilu paasisassarsiorlutik Nuummut tikeraassapput.

Marsip ulluisa 28-ianni ICC-p ataatsimiittarfiani ataatsimeeqatiginissaat Oqaasileriffimmiit piareersarneqarpoq. Oqaasiliortut, Nunat Aqqinik Aalajangiisartut, Inuit Aqqinik Akuersisartut ICC-llu Oqaatsinut Ataatsimiititaliaa ataatsimiinnissamut qaaqquneqassapput. Pilersaarutaavoq ataatsimiititaliat tamarmik suliarisartakkaminnik tikeraanut saqqummiussissasut.

Pisussaq kingusinnerusukkut erseqqinnerusumik nalunaarutigineqassaaq.


- 4 pillugu -

Oqaasiliortut EF, EU-lu pillugit allagaq tusaatissatut tiguaat, ilimanarmat Dansk Sprognævniup kingusinnerusukkut qanoq aalajangiisoqarsimanersoq Oqaasiliortunut ilisimatitsissutigiumaaraat.

- 5 pillugu -

CCO.: Ella Skiftep Jakob Kristiansenillu ataatsimeeqatigineqarnerannit eqqartorneqartut pingaarnerit ilanngussami takuneqarsinnaapput. (Ilanngussaq imaqarniliap quppernerisa kingullersaasa tullianiippoq).

Tassunga ilanngullugu CCO-ip ilisimatitsissutigaa apriilip ulluisa sisamaanni atuagaq saqqummersinneqassasoq qulequtaqartoq "Tarnikkut Nappaatit". (Atuakkami maniodepressiv ilaangilaq. Maniodepressiv tassa tipaatsulerujussuortarlungunilu nikallorujussuortarneq. Oqaaserli taamak takitigisoq immiini taaguutaasinnaangilaq).



Atuakkami tassani aammalu atuakkami "Isumaginninnermi Peqqinnissamullu ikiorti"-p quppernerisa kingullersaanni taaguusersuutit allassimasut Oqaasileriffimmilu katersat, timip pisataanut tunngasut, katiterlugit taaguusersuutitik saqqummersitsinissaq siunertaavoq. Print on demand atorlugu saqqummersitsinnginnermi, oqaatsit pineqartut Oqaasiliortunut akuerisassanngorlugit saqqummiunneqaqqaassapput.

- 6 pillugu -

Mikael Biilmannip allagaa isumaliutersuutitut Oqaasiliortunit nalilerneqarpoq. Mikael Biilmann akineqarnissaminik noqqaassuteqanngilaq. Allagaq tusaatissatut takorluukkeraarutitullu allakkanut assigiinngitsunut inaalillugu toqqorneqaannassaaq.

Oqaasiliortuni ataatsimiinneq tulleeq pissaaq tallimanngornermi aprilip ulluisa arfernganni, nal. 14.00.

(Ilanngussaq quppernerup uuma tullianiippoq.)

Carl Chr. Olsen
Siulittaasoq

Kristine Olsvig
Allatsi


Ilanngussaq

Ella Skiftep Jakob Kristiansenillu ataatsimeeqatiginnerannit Oqaasiliortunut ilisimatitsissut.

Carl Chr. Olsenip ilisimatitsissutigaa nutserisut isumasioqatigiinnerannit paasisimallugu, atuakkat naqitallu allat taaguusersuutitut tunngasut, pisortaqaqarfinnut assigiinngitsunut nassiussuunneqarnerisa kingorna, nutserisunut annguttarsimangitsut.

Malunnarpoq nutserisut sulinerminni timip pisataanut tunngasunik oqaatsinik ilisimasassaminnik amigaateqartut.

Ella Skifte taaguusersuutitik peqqinnissaqarfiup iluani atorneqartunik katersaqarpoq. Taamaattumik siunnersuutigaa, timip pisataanut tunngasut katersat ataatsimut immiullugit aaqqissuunniarneri



pingasuullutik suleqatigiissutigissagitik, pilertortumik taaguusersuutunik saqqummersitsinissaq anguniartariaqarmat.

SANA-mi pilattaaviup immikkoortortaarfiani nutserisoq Jakob Kristiansen, nammineq soqutiginninnini minnerunngitsumillu pisariaqartitsinini tunngavigalugu, Klinisk Ordbog najoqqutaralugu oqaatsit qallunaatuumiit kalaallisuumut nutsillattaarpai ilaatigullu latinerisut grækerisulluunniit oqaasertai ilannguttarlugit. Suliani aamma nakorsat allattaasa pisariaqartitseqisut oqilisaakkumallugit piffissaqarnini naapertorlugu suliarillattaarpaa. Klinisk Ordbogimit kalaallisut nutserillattaarnermini naqinneq E nallersimallugu oqaatigaa.

Jakob Kristiansenip sinerissami peqqinnissaqarfiit tusarniaavigiumavai, namminneerlutik nutsikkaminnik taaguusersuuteqarnerisut, taamaattoqarsimassappallu assilineqarneri noqqaassutigiumallugit.

Jakob Kristiansen suleqataanissaminut soqutiginnippoq, akuersinnginnerminili sulisitsisuni paaseqatigeqqaarumavaa.